

Бичкдүдт зуна сән амрлгъ бүрдәхмн

Бичкдүдт сара хонгас сургъульчнрин зуна амрлгън әкхлмн. Сургъульчнрин зуни амрлгъиг бүрдәмджтәгъяр кехин төләд сургъуль-әрдмин отделмүд, школмуд, комсомольск болн профсоюзн организацсла хамдан, ода нас авн әкдлж белдврин көдлмшән кех зөвтә.

Сургъуль-әрдмин отделмүд әртәснә йоста кевәр, тоолвртагъяр, сургъульчнрин зуни амрлгъиг бүрдәхд оньган өгх зөвтә.

Элстин пионермүдин Гер нидн джил балгъсна школмудин ах класмудин сургъульчнриг Кавказск уулсин, Домбайск царнъ тал туристск походт йовулв. Кесг туристск багмуд Ставрополь болн Волго-Донд одцхав. Приозерн района 60 сургъульчнр В. И. Ленинә пертә Волго-Донск канал тал йовад, Сталинград багъс оч хәләцхәв.

Бичкдүдин амрлгъна болн әмнлгънә көдлмш райондар кехләри, бәәрн газрин әв-аргъинь хәәдж кегдджәв. Улгүрлхд, Яшалтинск районд хойр пионерск лагерь бүрдәгдв, терүндн 87 күүкд орв, Каспийск районд — 70 күүкдәс нег лагерь гарв. Миньгъ гар пионермүд профсоюзн путевксар лагерьмүдт одад ирцхәв.

Сургъульчнрин зуна амрлгъ сәәнәр давулхар белдвр кехләри сургъуль-әрдмин отделмүд, школмуд болн нань чигн учрежденьс нидн джилин зуна амрлгъна ашмуд диглдж, терүнәс иштәгъяр эн джил бичкдүдин әрүл-менд харлгъяр ямаран көдлмш кех зурагъан темдглдж авх кертә. Нидн джилин ашмуд диглхләри багшнрин, комсомольск организац, сургъульчнрин коллективс болн нань чигн олна организацс өргәр орлцулдж күүндхмн. Бичкдүдин зуна амрлгъна зура темдглхләри РСФСР-н сургъуль-әрдмин Министерствин зааврар болн ВЛКСМ-н ЦК-н VIII Пленумин шиидврмүдәр гардвр кехмн.

Бичкдүдин әрүл-менд харлгъна зураг балгъснд болн район болгънар күүцәгч комитетст тәвдж батлхмн.

Политехническ сургъмдж — сургъульчнриг көдлгдж даскхгъна зуна амрлгъна шин янз керглгдджәнә.

Мана таньгъчин сургъульчнр зуна амрлгъан ик сәәнәр кехин төлә иим мероприяте темдглгдджәнә: сургъульчнрин производствени 27 бичкдүд, долан джилә школин сургъульчнр көдлх 20 звенос бүрдәгдджәнә. Дакад болхла, таньгъчин профсовет 200 бичкдүд амрдг пионерск лагерь бүрдәджәнә, крайин балгъсдар бәәси пионерск лагерьмүдт 250 бичкдүд одхмн, 27 дундин школд балгъсна лагерьмүдлә әдл пионерск лагерьмүд бас бүрдәджәнә. Энүнәс талдан кесг маршруттар төрсн край-

ан дасх йовдл болджана, энүнд орлцсн сургъульчнр Сталинград, Ставрополь, Кисловодск болн нань чигн балгъсд үздж, теднә хуучна туудж дасхмн.

Школмудт әрүл-менд харлгъни көдлмш зуна амрлгъна цагла сәәнәр кехин кергт, сургъуль-әрдмин отдел сургъулин джил чилхәс өмн күүкд хәләдг улс, вожатс, зүсн-зүүл кружоксин гардачнр, колхозмудин болн совхозмудин хоорндк лагерьмүдт ахлачнр, туристск йовдлмудт вожатс олдж авх зөвтә. Эн келгдсн тоот кергтә улсиг йир сәәнәр шүүддж авх кергтә, эк татач, цуцрлтан уга болн бичкн күүкдлә көдлхдән дурта улс йилгъдж авхмн; талдан областьсәс, крайсас болн республиксәс үлгүр авч, каникул әклтл шүүддж авсн кадрмуд дунд школьникүдин зуна амрлгъиг сәәнәр ягъдж кехин туск семинар бүрдәхмн; цуг багшнрин зуна көдлмшәс сулхвриг чикәр диглдж, школмуд болгънд амрчәх сургъульчнрла зуна туршарт багшнр бәәдгәр кех кергтә; пионерск, багъчүдин-комсомольск лагерьмүдт, сургъульчнрин производствени бригадст өдрин диг-дараг чикәр кедж, бичкдүд көдлмшән болн амрлгъан ирлцнъгъү сәәнәр кедгәр диглхмн. Сургъульчнрин производствени бригадсин члед дунд багшнр, агрономс болн талдан чигн специалистнр сән көдлмшин аац заадж, селәнә әдл-ахун машидт көдлхләри бийән саглхин тускар күүндвр кех кергтә.

Бичкдүдин зуна амрлгънд райондин болн балгъсна багъ наста путешественникүдин слет ик тусан халдах билә. Эн цуглрлгъиг зуна амрлгън әкхләс өмн кех кергтә. Таньгъчин сургъуль-әрдмин отдел районн, балгъсна отделмүдиг болн цуг школмудиг бичкдүдлә зуна амрлгъна көдлмш ягъдж кеджәхиг даньгин оньгтагъяр хәләджәх зөвтә. Амрлгъна цагла нег чигн сургъульчиг хәләмдж уга үлдәхмн биш! Сургъульч болгънд килмджтә болн сән амрлгъ өгхмн! Эн әрүн кергин төлә сургъуль-әрдмин органс болн школмуд профсоюз болн комсомол, багшнр болн эцкәкнр цуг чидлән негдүлдж зүтхх зөвтә.

Зуна байрта амрлгънд белдлгъиг болн амрлгъиг бүрдәлгънд, эн амрлгън бичкдүдин медрл бөдлүлхд, шин көдлмшин аац дасхд тусан халдах төриг партийн организацс гардх йоста. Зуна амрлгъна цагла школьникүдин әрүл-менд батрдж, тедн чидлтә-чирг, серглинъ болдж, ни негн бәәдг дасдж, иньг-үүрмүд болх зөвтә. Эн тоот медрл, сургъульчнрт зуна амрлгъна хөбн шинәс сургъулян әкхлхдн ик туста болхмн.